

Библейско-богословская коллекция
ИСТОРИЧЕСКАЯ СЕРИЯ

Евфимий, инок

**О РОСТРИГЕ, БЫВШЕМ МОНАХЕ
СИЛЬВЕСТРЕ МЕДВЕДЕВЕ,
ВВОДИВШЕМ ЕРЕСЬ
ЛАТИНСКУЮ
В ВЕЛИКОРОССИЙСКИЙ НАРОД.
О ПОКАЯННОМ ПИСАНИИ ЕГО.
ПОКАЯННОЕ ИСПОВЕДАНИЕ ЕГО**

Остен. Памятник русской духовной письменности
XVII века. Казань, 1865. С. 74-104

© Сканирование и создание электронного варианта:
издательство «Аксион эстин» (www.axion.org.ru), 2011



Аксион эстин
Санкт-Петербург
2011

**О РОСТРИГЪ, БЫВШЕМЪ МОНАХЪ СИЛВЕСТРЪ
МЕДВЪДЕВЪ, ВВОДИВШЕМЪ ЕРЕСЬ ЛАТИН-
СКУЮ ВЪ ВЕЛИКОРОССІЙСКІЙ НАРОДЪ.**

Въ царствующемъ градѣ Москвѣ бысть нѣкто, образомъ монашескимъ одѣянъ, именемъ Силвестръ, прозваніемъ Медвѣдевъ, родомъ сый отъ града Курска, и первѣе бѣ писецъ гражданскихъ дѣлъ, рекше подъячей, иже во вся своя дни творяше распри и свары, и мняше ⁽¹⁾ себе мудра быти, неукъ сый; языкъ свой изостряше яко змійинъ; въ устнахъ его бѣ ядъ аспидовъ, полнъ горести и отравы: злоковаренъ бо бѣ отъ юности возраста, и многорѣчивъ, и остроглаголивъ, и любопривъ (яко пишетъ святой Епифаній кѳирскій о Аріи еретицѣ, яко таковъ бѣ) ⁽²⁾, уста имѣя безъдверна, и изъ гортани изрыгающъ ядъ душегубительный всякаго лжесловія и ко-

⁽¹⁾ Въ рукописи: мни.

⁽²⁾ Св. Епифан. О ересяхъ кн. II. тв. т. II. стр. 206 — 207. Paris 1858.

варствъ , языкъ же непремолчно блядущъ ⁽¹⁾, толико яко всему тѣлу его мнѣтся быти языку, яко повѣствуется о нѣкоей многоблядивой женѣ ⁽²⁾, или яко юноша оный (о немже преподобный Никонъ антиохіанинъ пишетъ), въ немже хитрословяше демонъ, въ Оригенъ еретичъ глаголавый, съ нимже, юношею, никто спудеевъ ⁽³⁾ можаше противоглаголати; вся бо тыя, многаши же и епископы самыя и клирики, препираше, дондеже святой Епифаній кипрскій молитвою своею изгна изъ юноши онаго демона того, и тогда оста юноша онъ яко единъ поселянинъ, ничтоже умѣяй отъ писаній глаголати ⁽⁴⁾. Къ сему еще оный Силвестръ у нѣкоего иезуитскаго ученика приучися чести латинскія книги. И отъ таковаго книгъ онаго чтенія и отъ слышанія устоглаголаннаго онаго учителя своего и иныхъ латинниковъ обычаемъ латинскимъ навывче весь онамо уклонися и , отступивъ отъ святыхъ восточныхъ Церкви и отъ святѣйшаго Іоакима патріарха, тцашеся, по Божію попущенію, дѣйствомъ же діаволскимъ , догматы и преданія святыхъ апостолъ и святыхъ отецъ , суцая по чину восточныхъ святыхъ Церкви, развратити и въ латинство народъ православный превратити: еже

⁽¹⁾ Говорящій, болтающій, пустословящій.

⁽²⁾ *Пролог. декабря въ ѿла день* (лист. Ѡ).

⁽³⁾ На полѣ рукописи: философъ.

⁽⁴⁾ Рѣчь объ этомъ юношѣ слѣдуетъ далѣе (стр. 79).

и содѣлалъ бы, аще не бы всемогущая десница Вышняго предварила и злоумышленіе его разорила и самаго его сокрушила; уже бо о времени пресуществленія святыя тайны евхаристіи злѣмудреннѣ народъ возмути, и въ возглашеніи словесъ, прежде глаголаныхъ отъ Христа апостоломъ на тайнѣй вечери: «пріимите, ядите» и: «пійте», воспоминаемыхъ точію, не уже въ то время совершеннымъ сущымъ тѣлу и крови Христовъ, но еще възобразнымъ хлѣбу и вину подлежащимъ, поклонятися возустилъ по латинскому обычаю. Егоже, Силвестра, святѣйшій Іоакимъ патріархъ многаши особно и народно увѣщаваше, ежебы ему отъ сего престати, послѣдовати же древнему преданію святыя восточныя Церкви, яко священная писанія святыхъ апостолъ и святыхъ отецъ свидѣлствуютъ и яко святіи россійстіи чудотворци держаша, яко книги рамыхъ ихъ, рукописныя служебники, показываютъ. Онъ же отнюдъ не слушаше, но паче хвалящеся вся суцая Церкви развратити, и паче народъ смущаше и прелщаше. Святѣйшій же патріархъ, видъ его, Силвестра, яко не покаряется древнихъ святыхъ отецъ ученіемъ и словесъ ихъ не пріемлетъ и народъ наипаче смущаетъ, предаде его за оный мятежъ анаѳемъ и съ писанми его таковыми. Онъ же, Силвестръ, и первѣе отступивъ отъ святыя Церкви и отъ него, святѣйшаго патріарха, яко предречеся, въ ничто бывшую на него анаѳему вмѣни; обаче, за мятежъ

народный имяше царскою властію ятъ быти, бѣжа въ полское государство, ради измѣны и смущенія между государьствы, но ятъ подѣ границую полскою, монашескаго образа и имене лишенъ, пытанъ по градскому суду, и болше годищнаго времени въ троицкомъ Сергіевъ монастырѣ въ тюрьмѣ бѣ заключенъ. И тамо сый, пришедъ въ себе, о развращенія церковномъ покася и даде о томъ свое покаянное рукописаніе, анаѣематствуя все свое развращеніе, словесное и писменное, соанаѣематствуя купно и новоторныя книги, составленныя отъ латинскаго ученія учителемъ его и иными, яже суть овы писанныя, овы же и печатаны, отъ нихже, книгъ, онъ, бывый монахъ Силвестръ, прелстився, народъ смуты, и хлѣбу и вину, еще не пресуществованнымъ въ тѣло и кровь Христову, боголѣпныя поклонны творити народъ оболсти. По нѣколикѣмъ же времени по симъ, въ ¹⁵⁷⁴зрѣа году февраля въ (¹) день обличися онъ, бывый монахъ Силвестръ, въ измѣнъ и навѣтъ на благочестивое московское царство съ нѣкіими своими клеветы и съ волхвы, гадательствовавшими ему неудобная нѣкая, паки пытанъ огнемъ и иными истязанми по градскимъ судомъ и закономъ, повнеся во всемъ, и за то казненъ смертною казнію; глава ему отсѣчеся того же февраля мѣсяца въ 11 день съ единомысленниками и клев-

(¹) Желанное здѣсь число не означено въ рукописи.

реты его. На немже исполнися, яко отъ Духа Святаго глаголанное, пророчество святѣйшаго Юакима патріарха и суцаго при немъ священнаго свнода, глаголющихъ, яко иное нѣкое зло и крамола и вредъ на царство имяше отъ него прозникнути, и яко имяше тѣлесною казнію казненъ быти, яко казнишася новгородстіи еретици въ лѣто 1371, или яко Никита суждалецъ роспопа, казненный въ 1374 году, яко въ концъ собранія святѣйшаго онаго патріарха о пресуществленіи святыхъ таинъ, свнодално изданный на него, Сенку, судъ показуетъ оно прореченіе ⁽¹⁾.

Изъ книги преподобнаго Никона антиохіанина, отъ слова мѣ:

Начало прелести уму — тщеславіе, отъ негоже движимъ умъ, образы и зраки описовати покушается непостижимое.

Изъ житія святаго Елифанія:

Различнъ и многообразнъ діаволь многоплетенною злобою своею искушаетъ и прелщаетъ родъ челоувчeskій, и не свѣдѣнціи козней его удобъ отъ него уловляеми бывають, ови мірскими вещми и тѣхъ пристрастіемъ, овии же иными, яко васнъ ⁽²⁾, духовными, и иными безчисленными и неизчетными злобы его ухищренми, и въ хулу и ереси низвлачитъ, яко отъ лучившагося на юноши прелщенномъ показуется.

⁽¹⁾ Акт. истор. т. 5. стр. 341. Спб. 1842 г.

⁽²⁾ Вражда, злоба.

Тогожде (¹) — о юноши многоглаголивомъ и любопривомъ, отъ демона возмущаемомъ.

Бысть нѣкій юноша въ время блаженнаго Епифанія въ Квпрѣ, именуемый премудръ. Къ сему приступиша нѣци отъ иже тцаніе имущихъ (²) о писаніихъ и, случившеса, бесѣдоваху къ нему. (³) Онъ же заграждаше имъ уста препирательными словесы; многази же и клирицы и епископи и сія препираше, и прочее никтоже смѣяше съ нимъ спиратися. И проношашеса слухъ его по всему острову даже до Паѳа. Той же бѣ въ тцеславіи премудростнѣ рѣчивъ, и, боязнѣ творя на препираніе, премудростными смышленми сихъ претича тцеславяшеса. Дойде же слухъ его и до епископа. Слышавъ (⁴) убо яже о немъ Епифаній, и поболѣвъ, и разсуждая належащая его словеса, и помышляя, что убо есть юноша сей, иже на тцая и суетная сказанія писаній себе вдавъ, — вѣрою убо Христовою въоружився, рече: «приведите ми его съмо». Они же, шедше и увѣдѣвше, гдѣ есть, идоша къ нему, глаголюще: «епископъ Епифаній посла

(¹) Т. е. преп. Никона антиохіанина.

(²) Въ рукописи: имущымъ.

(³) На полѣ рукописи: Прелщенному сему юноши велми подобенъ бѣ Силвестръ Медвѣдѣвъ.

(⁴) Въ рукописи: слышахъ.

къ тебѣ, глаголя: прииди къ намъ». Онъ же, воставъ, поиде съ ними. Пришедше къ святому и, бѣсѣдъ бывшей, не у начаша препиратися, прежде даже помолится. Молящуся убо святому прилежнѣ, начатъ препирати и скрежетати зубы. Чудяхуся убо вси о дѣйствѣ молитвы епископовы. Святый же, уразумѣвъ силу молитвы, и еще множае молитву протязаше. И молящеся Господу Иисусу, глаголя: «Господи, исцѣли, разрѣши плѣннаго, и, иже мнозѣ времени мудрости препиравашаго демона явленна сотворивъ, отжени отъ созданія твоего и покажи вскорѣ немощь дѣйствовавашаго, Владыко нашъ Иисусе Христе». Тогда демонъ, видя себе изгоняема молитвою святаго, скрежеща зубы, и пѣняся, и перваго устроения всячески изгоняемъ, очи кровавы имѣя, нача устремлятися на святаго. Предстоящія же начаша держати его. Святый же рече: «нустите его». Онъ же, пущенъ бывъ, рече съ кричаніемъ: «ты ли мя изгоняеши»? Епифаній же: «Господь мой Иисусъ Христосъ изгоняетъ тя». Демонъ же отвѣща: «на сіе ли убо призвалъ еси мя, яко да въ толико время почитаема въ дому моемъ, обезчестивъ, изденеши»? Епископъ же рече: «Владыка созданія Иисусъ — свой сосудъ исцѣлити хошетъ; ты же мученъ будеши. Иже толицѣмъ временемъ творя препираніе словесе, мнѣлъ ли еси неязвенъ пребыти, нынѣ же, истязуемъ, изыди отъ юноши». Рече же демонъ: «не вѣси ли мя, кто есмь? ты ли изгоняеши мя?»

И возсмѣяся паки, рече: «аще и тобою невѣдомъ есмь, но отъ многихъ вѣдомъ быхъ». И святой: «кто еси?» рече. Демонъ же глагола: «азъ есмь, иже въ Оригенѣ глаголавый». И епископъ рече: «аще ты глаголаеши еси въ Оригенѣ, рцы, яже глаголютъ книги пері архонъ (¹), яже счини оказанный онъ». Демонъ же нача исперва книгу гра- несословити и, рекъ многа, премолче. Паки свя- тый къ нему: многи убо суть книги, яже счи- ни страстный онъ, и ни въ единой же ихъ безъ хулы преиде, и вѣрую, яко ты въ немъ глаголаеши еси; сочеталъ еси, яко слышу, и о воскресеніи неправеднѣ рекъ, извѣсти о семъ и рцы намъ то». И демонъ нача отъ пачала гла- голати книгу ону. Святой же, не могій терпѣ- ти хулы его, затче уши свои; такожде и кли- рицы заткоша уши, не терпяще яже на Господа Исуса хулы. Тогда святой Епифаній, возопивъ, рече: «молчи, проклятый сыне геенскій съ еди- номудрымъ тебѣ Оригеномъ». Внезапу убо че- ловѣкъ по испытаніи обѣшенъ бывъ (²), едва ногами земли досязаше, прокля же себе, глаго- ля: «аще быхъ вѣдалъ, яко на разрушеніе свое гряду къ тебѣ, не быхъ оставилъ бесѣдовати тебѣ моего человѣка; но мнѣвъ, яко и тебе, якоже многихъ, подкраду крадословіемъ, отпа-

(¹) *Пері ἀρχῶν.*

(²) На полѣ рукописи: явленно, отъ діавола обѣшенъ бысть человѣкъ оный.

дохъ чаянія и осуетихся отъ упованія . многы бо погубихъ злыиъ (1) учителствомъ, велми тыя прелестивъ и вреднъ научивъ моимъ ученіемъ». И нными же множайшыи словесы окаяше себе демонъ, изгоняемъ отъ святаго ; заповѣдаше бо ему отыти отъ юноши. Тогда рече святой: «во имя Исуса Христа, Сына Божія, изыди изъ юноши, никакоже его вредивъ». Онъ же, на землю повергъ его и стрясъ, отыде отъ юноши. Святой же повелъ предстоящимъ спрятати юношу и прирадьніа сподобити. Клирици же, поимше его, вопросиша, отъ кѣихъ странъ острова есть. Той же по обычнѣи села своего бесѣдъ рече: «отъ Месога глаголемаго села есмь острова сего». Они же къ нему: «сице глаголеши; и како вчера ясно отвѣщаль еси»? Онъ же рече: «не вѣмъ, что глаголете, ниже како придохъ съмо». Возвѣстиша сія епископу, и почудися, како діаволь жадаеть человѣческіа погибели.

О ПОКАЯННОМЪ ПИСАНІИ СИЛВЕСТРА МЕДВѢДЕВА.

Въ лаврѣ пресвятыя и живоначальныя Троицы, Сергія радонежскаго въ монастырѣ, Сенка Медвѣдевъ, бывый монахъ Силвестръ, носивый имя стронительское, Спасскаго монастыря, что на Москвѣ за иконнымъ рядомъ, написавъ своеруч-

(1) Слово «злыиъ» писано сюда съ полн рукописи.

но покаянное исповѣданіе о бывшемъ своемъ коварномъ ухищреніи на святую восточную Церковь и о еже яко зломудрствованіе о пресуещствленіи пречистыхъ таинъ тѣла и крове Христовы и о прочихъ, съ великимъ ⁽¹⁾ умиленіемъ, исповѣдуясь, чтяше предъ образомъ пресвятыя и живоначальнойя Троицы и пресвятыя Богородицы и преподобныхъ Сергія и Никона чудотворцевъ, присущу тамо, ради истиннаго и достовѣрнаго свидѣтельства, того троицкаго Сергіева монастыря пречестну мужу священноархимандриту Викентію, да іеродіакону Іосифу, казначею благовѣщенскаго монастыря изъ нижняго Новаграда, и инымъ. И прочеть онъ, бывшій монахъ Силвестръ, оно свое рукописаніе, подаде е архимандриту Викентію съ нижайшимъ поклоненіемъ даже до земли, яко самому намъ святѣйшему патріарху, прося послати то его писаніе къ мѣрности нашей, извѣствуя ему, архимандриту, и словесы, яко написа онъ писаніе оно самовольно ⁽²⁾, правою мыслию и добροхотнымъ ⁽³⁾ сердцемъ, безъ всякія лести и лукавства, со всякою истинною, а не отъ нужды, ниже отъ страха какова, ниже ласкательно, хотя, по Ананіи и Сапфирь, искусити Духъ Господень, ниже мысля тѣмъ свободитися здѣшняго наказанія и епити-

(1) Въ рукописи: съ величъ.

(2) Самъ по своей волѣ, добровольно.

(3) Въ рукописи: доброхотны.

міи, но вседушно каюся о грѣсѣхъ своемъ сицевомъ и соблазнѣ величайшемъ, имже Церковь святую смути и народа премногы сущыя соблазны всякаго чина и возраста, въ прочее же обѣщася до смерти живота своего всякое наказаніе съ радостію терпѣти, яко и самое писаніе его являетъ. Архимандритъ же Викентій, видя его сицевое покаяніе и устное исповѣданіе и прошеніе, наказа его кроткими словесы, дабы пометоваль, яже писа и яже глаголетъ, и дѣлы бы исповѣдалъ сіе свое ко Господу Богу обѣщаніе, и свое, аще не сохранить всѣхъ, здѣ написанныхъ, самовольное себѣ, отъ святыя Троицы, Отца и Сына и Святаго Духа, отлученіе и анаѳематство и прочая (¹), яже самъ написа. Воземъ оно писаніе его, посла къ намъ, святѣйшему Іоакиму патріарху.

Мѣрность же наша, пріемши у посланныхъ тое писаніе, по нѣкихъ днехъ собра въ патріаршескую крестовую палату преосвященныя архіереи и всего царствующаго града Москвы весь священный чинъ, архимандриты, игумены, протопрезвѣтеры, іереи и діаконы отъ всѣхъ церквей, и повельхомъ первопрестольныя церкви усупенія пресвятыя Богородицы протопресвѣтеру Іоанну прочести всѣмъ въ слухъ.

По прочтеніи же того, подобное тому же иное исповѣданіе тоеяже ереси послѣдователя мона-

(¹) Въ рукописи: проча.

ха Сумеона, бывшаго іереа Саввы, по прозванію Долгаго, повелѣхомъ самому ему монаху Сумеону честі свое исповѣданіе въ слухъ всѣмъ ⁽¹⁾, со слезами каяся, яко вси, присушіи тогда тамо, свидѣлствуютъ. И исповѣда грѣхъ свой и соблазнъ, имже многыя соблазни.

И по прочтеніи сихъ, ему же протопресвитеру Іоанну повелѣхомъ отъ нашего архипастырскаго лица честі поучательное слово. Яже вся оная здѣ порядно положена зрятся.

По сихъ повелѣхомъ покаянная она писанія Сенки Медвѣдева и монаха Сумеона Долгаго и свое архипастырское поученіе хотящимъ священнаго чина сущимъ написано вѣдати, дондеже все, о семъ потружденное, будетъ собрано и печатнымъ тисненіемъ издано ⁽²⁾.

ПОКАЯННОЕ ИСПОВѢДАНІЕ БЫВШАГО МОНАХА СИЛВЕСТРА МЕДВѢДЕВА.

Благоволеніемъ и щедротами премилосердаго всеблагаго промышленника Бога, не хотящаго смерти грѣшному, но еже обратится и живу быти ему, за еже ми познати истинну. Отъ созданія всемірнаго бытія ^{ѣзрчи} ⁽³⁾ лѣта, мѣсяца декемврія въ ⁽⁴⁾ день.

(1) Здѣсь вѣроятно пропущено: и читше

(2) Предположеніе это, какъ извѣстно, несостоялось.

(3) Въ рукописи стойтъ здѣсь ^{ѣзрчи}, но въ концѣ настоящаго исповѣданія (смотр.. стр. 104) — ^{ѣзрчи}.

(4) Желасмое здѣсь число не означено въ рукописи.

Великій господинъ, святѣйшій куръ Іоакимъ, московскій и всея Россіи и всѣхъ сѣверныхъ странъ патріархъ, не яко не щадящій овецъ, но яко полагаий за овцы душу пастырь добрый, и вѣрный таинъ Христовыхъ строитель, желая мнѣ грѣшному Сенкъ Медвѣдеву, прежде бывшему монаху Силвестру, спасенія и ко святѣй Христовъ восточнѣй Церкви отъ моего о пречистыхъ и животворящихъ таинъ пресущественіи неправославнаго мнѣнія обращенія, благоволи во святую обитель святыхъ и живоначальныхъ Троицы и преподобныхъ отецъ Сергіа и Никола, радонежскихъ чудотворцевъ, прислати всемилостиваго Спаса, что на Новомъ, архимандрита Игнатіа, воздвиженскаго монастыря прежде бывшаго игумена Ефрема, православнаго учителя Софроніа грека со иными священнаго и иноческаго чина. А съ ними благоволилъ прислати патріаршескія своя книгохранительницы отъ части старинныхъ книгъ въ достодолжное увѣреніе, яко прежде призыванія Святаго Духа словесы токмо Господними: «пріимите, ядите: сіе есть тѣло мое» и: «сія есть кровь моя», имже токмо азъ, сѣмшѣнно и латиншудренно послѣдую книгамъ кіевскимъ, глаголахъ пресущественію быти, еще дары тѣла и крове Христовы суть не совершены и безъ пресущественія, дондеже прійдетъ часъ іерею призывати святую и покланяемую Троицу и глаголати къ Богу Отцу молително: «низпосли Духа твоего Святаго на ны и на подлежащія дары

сія, и сотвори убо хлѣбъ сей — честное тѣло Христа твоего, и еже въ чаши сей — честную кровь Христа твоего, преложивъ Духомъ твоимъ Святымъ», російскихъ древнихъ святыхъ, на пергаминѣ и на бумагѣ рукописанныя служебники, и иныя на греческомъ и славенскомъ языкѣ многихъ святыхъ книги, и премногія и различныя свидѣтельства, собранная отъ богоносныхъ святыхъ отецъ, восточныя Церкви учителей древнихъ, и отъ самыхъ апостольскихъ священнодѣйствъ извѣщенія, выписаная изъ ихъ святыхъ литургій, и въ первыхъ — изъ литургіи святаго апостола Іакова, брата Господня, егоже самъ Христосъ Сынъ Божій научи священнодѣйствовати божественную литургію, изъ литургіи святаго Марка евангелиста, священнаго Климента, ученика Петрова, изъ его литургіи. А въ тѣхъ апостольскихъ литургіяхъ показуется совершеніе быти таинства евхаристіи призываніемъ Святаго Духа чрезъ молитву іерейскую.

Сіе же утверждающая святыхъ свидѣтельства суть сія: въ первыхъ, древняго святаго Діонисія ареопагита, ученика святаго апостола Павла, святаго Кирилла, патріарха іерусалимскаго, Василія великаго, архіепископа кесарійскаго, преподобнаго и богоноснаго отца Ефрема сурина слово рѣз, святаго Іоанна Златоустаго, патріарха константиноградскаго, Софронія, патріарха іерусалимскаго, Прокла, патріарха константинопольскаго, преподобнаго отца Іоанна Дамаскина, Теофилакта, архіепископа болгарскаго, Каллиста,

патріарха константиноградскаго, Сумеона, архієпископа ессалоническаго, Николая Кавасила, архієпископа диррахійскаго, Марка, митрополита ефесскаго, посрамившаго латини на флоренскомъ соборѣ, Максима грека, въ житіи святаго и во ученіи искусвѣйшаго, Георгія Пахимера, толковника книги святаго Діонисія ареопагита, Нектарія, блаженнаго патріарха іерусалимскаго, и иныхъ премногихъ восточныя церкви учителей православныхъ, — четырехъ святѣйшихъ патріарховъ православныхъ: Парѣнія, константинопольскаго патріарха, Іоаникія, александрійскаго патріарха, Макарія, патріарха антиохійскаго, Паисія, патріарха іерусалимскаго, и иныхъ премногихъ митрополитовъ и архієпископовъ священнаго тѣхъ синода свидѣтельство, согласное во всемъ святымъ нашимъ отцемъ, надъ сими же всѣми — трехъ сотъ шестидесяти седмихъ богоносныхъ отцевъ святаго седмаго вселенскаго собора.

А вышепомянутыхъ служебниковъ рукописанныхъ святыхъ нашихъ отцевъ древнихъ российскихъ ИМЕНА суть сія: первый служебникъ иже во святыхъ отца нашего Кипріана, митрополита московскаго и всея Россіи, писанный на хартіи, въ полдестъ, въ лѣто 1576, второй служебникъ иже во святыхъ отца нашего Евѡмія, новгородскаго чудотворца, писанный на бумагахъ въ лѣто 1578, третій служебникъ харатейный, въ четверть, писанный, преподобнаго и богоноснаго отца нашего Сергія, радонежска-

го чудотворца, четвертый служебникъ святаго Серапіона архієпископа, новгородскаго чудотворца, рукописный, пятый служебникъ преподобнаго игумена Іосифа волоколамскаго рукописный, въ полдесть, шестой служебникъ первоначальныя московскія печати, въ полдесть, седмый служебникъ древній кіевскія печати, въ полдесть, осмый служебникъ печатанъ въ Кіевъ при архимандритѣ Елисеѣ Плетенецкомъ.

Да съ тѣми же книгами — второзданный Номоканонъ въ печерскомъ монастырѣ лѣта 3746.

И во всѣхъ тѣхъ служебникахъ, и въ номоканонѣ, и иныхъ книгахъ со апостольскими литургіями и со святыхъ древнихъ и богоносныхъ отецъ, учителей и столповъ святаго христовы восточныя Церкви, свидѣтельствами о совершеніи святыхъ таинъ бываетъ призываніемъ Святаго Духа.

Пишетъ же о семъ въ оныхъ служебникахъ, по изреченіи словесъ Господнихъ и «твоя отъ твоихъ», сице: «Егда хоцетъ іерей творити призываніе Святаго Духа и дары совершати» и прочая, и потомъ іерей, глаголя къ Богу Отцу молитву призыванія Святаго Духа; и абіе совершаетъ дары сими словесы: «и сотвори убо хлѣбъ сей — честное тѣло Христа твоего, а еже въ чаши сей — честную кровь Христа твоего».

И азъ многогрѣшный Сенка, прежде бывый монахъ Силвестръ, нынѣ же погубивый, за свое о пресуществленіи святыхъ таинъ злое мудрованіе и развращенная моя писанія, образъ святой

монашескій, видѣхъ въ тѣхъ древнихъ святыхъ отецъ саморучныхъ служебникахъ и апостольскихъ священнодѣйствахъ и иныхъ книгахъ святыхъ отецъ согласное писаніе, противное же моему мнѣнію, которое азъ держалъ, и мудрствовалъ, и училъ тако, яко богоотступный римскій костель содержитъ, а не тако, яко держитъ восточная Церковь и тоя православнии учителя, и не по ученію глаголющихъ единомысленно и пишущихъ, яко призываніемъ Святаго Духа совершеніе бываетъ, увѣрихся о томъ тѣми древними книгами святыхъ отецъ, истинно держу отнынѣ съ тѣми, въ Дусѣ Святѣмъ глаголавшими, древними святыми и со всеми святѣйшими патріархи, правящими святую Христову восточную Церковь.

А за то мое о ономъ преждее ⁽¹⁾ неправое мудрованіе отъ всея восточная Церкве и отъ святѣйшаго патріарха и отъ всего священнаго собора, аще мене грѣшнаго не отринетъ и покаяніе мое не отвратитъ, въ томъ моемъ согрѣшеніи прошу прощенія, о чесомъ и горць плачуся и рыдаю; понеже согрѣшихъ, окаянный, мудрствовахъ и глаголахъ противная святымъ учителямъ и свѣтиломъ церковнымъ неправо и, коварно толковавъ, приводихъ словеса ухищренно.

Еще же иныя, въ православіи и святости свидѣтельствоваанныя мужи, противниками Христу нарицахъ и хулниками: Марка ефесскаго, свя-

(1) Въ рукописи: прежде.

тѣйшаго митрополита, Николая Кавасила дирра-
хійскаго, Сумеона ѳессалоническаго, Гавріила фи-
ладелфійскаго, Іоанна, благоговѣйнѣйшаго іереа,
писателя святыя книги «Скрыжали». И въ семь
азъ, грѣшнѣй, согрѣшихъ и прошу прощенія;
понеже суть учителя православніи и Церкви вос-
точныя защитники.

Еще же азъ и святѣйшія патріархи грече-
скія, пастыри сущія и хранители благочестія,
хулнѣ называхъ имени непристойными и не лѣ-
пыми. И о томъ азъ зѣло каюся, и смиренно
у нихъ, святѣйшихъ патріарховъ, со слезами
прошу прощенія и разрѣшенія.

Такоже приношу ⁽¹⁾ покаяніе и прошу про-
щенія и разрѣшенія у искренняго моего пасты-
ря и отца святѣйшаго курь ІОАКИМА московска-
го, всероссійскаго патріарха; понеже клеветахъ
и называхъ его досадными и укорными име-
ны предъ многими чловѣки, и благословенія
его, милости же и правомудрствія удалихся, яко
сынъ блуднѣй, далече на страну онаго о пре-
существленіи латинскаго суемудрія и пребывалъ
въ томъ многое время.

Согрѣшихъ же и въ семь, яко и прочіи архі-
ереи называхъ азъ неискусными и неучеными, за
то что они въ томъ моемъ мудрованіи не были
согласни. И непщевахъ, бѣднѣй, себе въ томъ
мудра быти и учена; обьюродѣхъ и въ послѣд-

(1) Въ рукописи: «прошу», а на полѣ ея поправка: «приношу».

нее, увы, неистовство въ томъ о пресуществленіи еретическаго латинскаго, новопроизмышленнаго на флоренскомъ соборищи, мудрованія низгедохся, и приближихся до вратъ адовыхъ. Волю изъ глубины сердца и, плача, прошу прощенія и разрѣшенія азъ, окаянный, отъ святѣйшаго патріарха и всего священнаго собора.

Еще же согрѣшихъ, яко навѣтовахъ и на иныя православныя мужи и въ Вѣрѣ непорочной искусныя и неблаженно послѣдующія святѣй восточнѣй Церкви и тоя святымъ духоноснымъ учителемъ,—на пречестнаго отца, печатнаго двора игумена, Сергія, и на преждебывшаго Чудова монастыря уставщика Моисея и на симъ подобныя глаголахъ слова всякаго безчестія и злословія наполненная.

Еще же согрѣшихъ азъ и въ семь, еже клеветахъ и глаголахъ слова хульна и бредна и на пречестныя отцы, въ вѣрѣ православнѣй и мудрости свидѣльствованныя мужи, Іоаннікія и Софронія іеромонахи, присланныя отъ цареградскаго и іерусалимскаго и иныхъ православныхъ патріарховъ И о томъ азъ, грѣшный, у нихъ отцей прошу прощенія и молитвы. Книгу же нареченную «Врачество» (1), юже они изложиша,

(1) Полное заглавіе этого сочиненія такое: «Акошь или врачеваніе, противопомогаемое ядовитымъ угрызеніемъ, въ начертаніи разглагольствія между учителемъ и ученикомъ, къ общей пользѣ и исцѣлѣнію язвъ неправомудрствующихъ въ совершени таинства евхаристіи». *Евген. Словар. историч.* т. I, стр. 238. Спб. 1827

азъ нынѣ приѣмлю и лобызаяю, исповѣдую православну (¹) сущу, истинная догмата святыхъ отецъ нашихъ въ нейже писана праведно и нелестно.

Еще же согрѣшихъ азъ, окаянный, и зѣло, яко порицахъ и клеветахъ и словеса ложная разсѣвахъ и еретикомъ называхъ самага православнаго мужа и правды ревнителя и Церкви поборника и вѣры защитника пречестнаго отца Евѳѳѳіа, отъ святыхъ отецъ собравшаго на защищеніе восточныя церкви тетради, яко по преданію самыхъ апостолъ и святыхъ отецъ богоносныхъ въ божественнѣй литургіи пресуществляется хлѣбъ и вино пришествіемъ и дѣйствомъ Святаго Духа, чрезъ призываніе іерейское въ молитвѣ къ Богу Отцу: «и сотвори убо хлѣбъ сей — честное тѣло, а еже въ чаши сей — честную кровь» и прочая.

Азъ, окаянный, хотя то правое восточныя Церкви мудрованіе разрушити, на тѣ православныя тетради написахъ книгу неправильно и неправо, по своей воли самочинно, и развращахъ живо и коварно, добрая полагая злѣ, а злая добра быти. И той моей, на восточныя Церкви мудрованіе противописаннѣй, книзѣ назвахъ имя «Манна хлѣба животнаго», яже поистиннѣ (да вѣдять вси) не есть манна, но православныхъ обмана и прелесть, не хлѣба животнаго манна, но яда душегубительнаго исполненная отравя; понеже

(¹) Въ рукописи — прославляю.

въ той книзѣ, душегубительнѣй обманѣ, написано отъ мене, Сенки Медвѣдева, многое блядословіе на святую восточную Церковь, якобы она со Христомъ не держитъ и Христову ученію не послѣдуетъ, но держитъ преданія челоувчская и вымышляетъ новости. И о томъ азъ у святѣйшаго патріарха и у всего священнаго собора за то развращенное мое писаніе и истиннѣ противленіе прошу со слезами прощенія и разрѣшенія.

Въ той же книзѣ азъ, окаянный, писахъ римскому, отпадшему отъ благочестія, костелу многая похвалная словеса, якобы римская Церковь пресущественіе держитъ со Христомъ и Христову ученію послѣдуетъ и тѣмъ она невинна. И о семъ нынѣ каюся и рыдаю горцѣ и прощенія умилно прошу отъ святѣйшаго патріарха и всего священнаго собора.

Еще и о семъ приношу (¹) покаяніе и все-смирненно прошу прощенія, яко непознахъ прежде совершенно словеса святыхъ, разумъ тѣхъ, наипаче же святаго Іоанна Златоустаго приводихъ, въ той моей суетнѣй книзѣ, во утвержденіе моего неправеднаго мнѣнія; понеже иное Іоаннъ святѣй глаголетъ, иное же азъ самомнѣніемъ, не разумѣвъ истинны, толковахъ, противно святымъ утверждая. Тѣмже горе, глаголетъ Екклесіастъ, единому; спасеніе же во мнозѣ совѣтъ бываетъ (²).

(¹) Въ рукописи: прошу.

(²) Притч. 11, 14.

И о семъ азъ нынѣ совершенно и пространно научихся и извѣстихся книгами, присланными отъ святѣйшаго патріарха, и премногими свидѣтельствами самаго того Златоустаго и иныхъ святыхъ отецъ, яко показующихъ совешенію быти призываніемъ и дѣйствомъ Святаго Духа, чрезъ молитву священническую, понеже и Христось на вечери тайнѣй, якоже глаголетъ Іоаннъ Златоустъ въ словѣ и на пасху, неизреченными призываніи тѣло и кровь свою соверши (¹), а не сими словесы: «примите, ядите» и прочая. Сія убо словеса Христось рече по пресуществленіи, преподавая ученикомъ и апостоломъ самое свое божественное тѣло и самую свою кровь, извѣствуя и утверждая вещь быти, а не хлѣбъ простъ, ниже образъ тѣла и крове, глаголя: «сіе есть тѣло мое» и: «сія есть кровь моя». И сице сіе толкуютъ вси святіи, Василій великій въ «Постныхъ», Теофилактъ архіепископъ, Кириль іерусалимскій, Іоаннъ Дамаскинъ, и иніи вси едино глаголютъ, яко тая словеса не о пресуществленіи, но о извѣщеніи, яко не образъ, но самое тѣло и кровь.

Еже азъ, окаянный Сенка, вся тая зль превращахъ, пиша о пресущественіи по латинской мысли; соглашаяся съ киевскими книгами, тая словеса глаголахъ, а святыхъ отецъ разумѣнія, яко Духомъ Святымъ, чрезъ призываніе іерейское, пресущественіе бываетъ, инако толковахъ, и тако о

(¹) S. J. Chrysost. opp. t. VIII. p. 751 — 752. Paris. 1859.

ономъ злѣмудрствовахъ, яко латини. И о семъ азъ каюся и плачу и прошу прощенія у патріарха и всего священнаго собора.

Еще же и въ семъ согрѣшихъ, въ тойже моей книзѣ суемнѣнно приводя во свидѣтельство моего мнѣнія отъ книги Арменопула, отъ посланія Димитрія хоматинина, реченное о латинѣхъ и о вещехъ ихъ развращенно толковахъ, еже бы быти въ томъ съ римляны согласнымъ православнымъ, глаголя: якоже они отъ насъ священнодѣйствуемая, и мы тако отъ онѣхъ святая вмѣняемъ и не блазимся, а римская (глаголахъ азъ, окаянный) Церковь пресуществованіе творить Христовыми словесы, а не молитвами отъ іереа; тоя убо у нихъ, римлянъ, нѣсть. А того азъ, окаянный, не вѣдахъ, яко они, римляне, суть духоборцы, того ради и молитву призванія Святаго Духа отвергли и, отступивше отъ восточныя святыя Церкви, и литургію древною святаго апостола Іакова отринули и по своему суемнѣнію новую сочинили и богопротивно и пребеззаконно, паче же и вредословно ⁽¹⁾ на прѣснокахъ дѣйствуютъ. И о томъ нынѣ, что въ пресуществованія соглашахъ римскую Церковь съ восточною, соглашаяся съ кіевскими, азъ каюся и прощенія прошу и разрѣшенія у святѣйшаго патріарха и всего священнаго собора.

(1) Хульно.

Еще же азъ въ тойже книзѣ согрѣшихъ, и; отвѣщая пиша ко тетратей писателю, неистовно отвѣтуя глаголахъ, яко сія мысль западныхъ Церкви, въмы, яко западная Церковь тако вѣруеть о пресуществленіи Господними глаголы; якоже Онъ постановилъ есть и апостоломъ такожде творити заповѣдалъ есть, того ради и они тако творять, и то винно ли римляне творять, еже со Христомъ о пресуществленіи Его словесы вѣрують? И о томъ неистовомъ моемъ дерзновеніи прошу прощенія, и каюся о таковыхъ моихъ безумныхъ глагольхъ.

Каюся же и о семъ, идѣже азъ глаголахъ и совѣтовахъ въ томъ съ римляны быти намъ согласнымъ, сице пиша: «аще ли, обезумяся, речеши: аще кто тако о пресуществленіи, яко римляне, Христовыми словесы вѣруеть быти, той римскія Церкви послѣдователь и согласникъ ея: то и намъ якобы уже тако не подобало о томъ держати, ради того, еже римляне тако держать, дабы намъ въ томъ съ римляны не быти согласнымъ». И глаголахъ ниже: «о великія злобы тако глаголати, яко православнымъ христіаномъ восточныя Церкви съ римляны въ томъ соглашати не подобаетъ!» И ниже паки суетнѣнно глаголахъ: «римляне вѣрують, яко Сынъ Божій воплотися». И паки: «римляне крестятся во имя Отца и Сына и Святаго Духа, римляне поклоняются святымъ иконамъ, римляне святыхъ въ помощь призываютъ». И иная таковая, въ рим-

скомъ костелъ пріятая и содержимая, повѣствованъ, хотя съ ними въ томъ соединитися, и того ради римляны похваляхъ, восточную же Церковь обхуждахъ и порицахъ сице: «а нынѣ восточная, явленно, Церковь уже не такъ творитъ, но, лучше тѣхъ Христовыхъ словесъ, поповскихъ молитвенныхъ: «и сотвори убо» и прочее слушаетъ и оными претворяетъ». И ниже глаголахъ похвалная въ томъ римлянъ, блядословихъ: «а латины отъ сего показываются, еже держать пресуществленіе, со Христомъ согласное, право въ томъ мудрствующіи суть». И инья въ той книзѣ безумно положенныя похвалы западному римскому костелу, восточнѣй же Церкви, невѣсть (Христовой), гажденіе и укоризны и лжесловіе. И просто рещи: вся та книга «Манна» укоризнами и лжами наполненная, истинны же далече, яко тма отъ свѣта. И того ради азъ, окаянный, вся тая моя, въ ней писанная, и иная неправая писанія яковалибо, и противная святѣй восточнѣй Церкви мудрованія, отъ мене чрезъ слово или чрезъ писмо въ міръ разсѣявшаяся вредословія и отъ иныхъ симъ подобнѣ сложенная и исплетенная лжесловесія на святыхъ отцы и на всю Христову восточную Церковь и на православныхъ греческихъ патріарховъ и на великаго господина святѣйшаго куръ ЮАКИМА, московскаго и всея Россіи и всѣхъ сѣверныхъ странъ патріарха, и на вся православныя восточныя Церкви учителя и благочестивыя мужи нанесенная, вся тая отмену и от-

рицаю, оплеваю, подъ ноги пометаю, и попираю, и огнемъ сожигаю, и анаѳемъ предаю.

Мудрствую же и послѣдствую святѣй восточнѣй Церкви, матери нашей, и святѣйшимъ четверемъ патріархомъ, восточнаго благочестія правителемъ и хранителемъ, и святѣйшему кврѣ ЮАКИМУ, московскому и всея Россіи и всѣхъ сѣверныхъ странъ патріарху, и всему священному собору, и впредь не точію злыхъ яковыхъ писаній, но ниже добрыхъ, о церковныхъ вещехъ имамъ писати безъ благословенія святѣшаго патріарха и всего священнаго собора.

Отнынѣ же свидѣтеля Бога представляю ⁽¹⁾ на мою душу, изъявляю самую простую истинну и самовольное, и вседушно и прильжно каюсь и плача предъ священнымъ соборомъ извѣствую и въ семь мое согрѣшеніе, яко поклоны боголѣпныя поущахъ люди творити на словесѣхъ Христовыхъ, воспоминательнѣ и повѣствовательнѣ нынѣ глаголемыхъ отъ іереа, тогда же, на вечери тайнѣй, отъ Христа по пресуществленіи изреченныхъ повелительнѣ и изъявительнѣ ко апостоломъ; не у бо намъ повелѣвающихъ ясти, ниже къ намъ глаголемыхъ, егда еще дары несовершенны суть, ниже пресуществишася въ тѣло и кровь Христову, но токмо възобразны, сирѣчь образъ тѣла и крове Христовы, суть хлѣбъ и вино, якоже глаголетъ святѣй з вселенскій со-

(1) Въ рукописи: преставляю.

боръ, дѣяніе ѿ, въ свитцѣ ѿ, и святой Іоаннъ Дамаскинъ, ясно глаголя въ книзѣ д̄ въ главѣ д̄. «Аще же нѣцый и възобразная тѣлесе и крове Господни хлѣбъ и вино назваша, яко богоносный рече Василиій, не по еже освятитися рекоша, но прежде еже освятитися самой просфоръ», толкуеть святой Іоаннъ Дамаскинъ ⁽¹⁾ реченіе святаго Василіа, послѣ словесъ Христовыхъ «возобразная» положенное ⁽²⁾, яко егда Василиій великій рече подлежащая възобразна, тогда хлѣбъ и вино не быша освященна, и хлѣбъ бѣ якоже хлѣбъ и вино простое, сирѣчь существо хлѣба и вина не имѣ пресуществленія.

И тѣмъ моимъ поущеніемъ премножайшыя прелстихъ и соблазнихъ, и Церковь смутихъ тѣмъ безмѣствомъ и безчинствомъ, по обычаю латинскому, прившедшему съмо изъ малороссійскія страны ⁽³⁾, и ⁽⁴⁾ въ томъ смертно согрѣшихъ, хлѣбу и вину боголѣпную честь отдавати учяхъ, и отъ нынѣшняго времени исповѣдую всѣмъ православнымъ христіаномъ и обличаю то мое прежд-

⁽¹⁾ Точи. излож. прав. Вѣр. кн. 4. гл. 13. стр. 255. Москва. 1844 г.

⁽²⁾ Въ чинѣ литургіи его. Смотри. Служебник. лист. 147. наобор. Кіевъ, 1851 г.

⁽³⁾ Въ рукописи: «прившедшымъ съмо въ Россію изъ малороссійскія страны, по обычаю латинскому». Мы поправили это выраженіе по соборному постановленію о разрѣшеніи отъ церковнаго отлученія Сумеона Медвѣдева. См. Акт истор. т. V. стр. 338. Сиб. 1842 г.

⁽⁴⁾ На полѣ рукописи: внемли.

нее неправославное и вредословное мудрованіе. Совѣтую же не отъ мене грѣшнаго, но отъ учителей церковныхъ святыхъ, яже видѣхъ въ писаніихъ, на мое увѣреніе отъ святѣйшаго патріарха присланныхъ, ⁽¹⁾ покланятися тѣлу и крови Христовъ по освященіи и пресуществленіи хлѣба и вина въ тѣло и кровь Христову дѣйствомъ Святаго Духа, чрезъ призываніе іерейское, егда грецы обычай благочестивый имутъ покланятися, по чину святыхъ восточныхъ Церкви. Слова же Христова и вѣрую и извѣствую, якоже извѣстихся отъ согласныхъ учителей святыхъ Божія восточныхъ Церкви: «примите, ядите: сіе есть тѣло» и прочая, и: «сіа есть кровь» и прочая, и: «сіе творите въ мое воспоминаніе», быти святыхъ тайны евхаристіи начало и основаніе, яко святіи отцы, восточныхъ Церкви богоносніи учителя, учать. Самое совершеніе святыхъ даровъ и пресуществленіе хлѣба и вина въ тѣло и кровь Христову исповѣдную призываніемъ и дѣйствомъ Святаго Духа, чрезъ молитву и благословеніе священническое и печать креста, въ словесѣхъ, Бога Отца молящихъ: «и сотвори убо хлѣбъ сей — честное тѣло Христа твоего, а еже въ чаши сей — честную кровь Христа твоего, преложивъ Духомъ твоимъ Святымъ, аминь».

Здѣ быти вѣрую и исповѣдную хлѣбъ—истинное тѣло Христово и вино — истинную кровь

(¹) На поля рукописи. знаменаті.

Христову, и право и благочестиво наричу я возлюбленная будущихъ, исповѣдуя, по святому Іоанну Дамаскину, не яко не сущая тѣло и кровь Христова, но яко тѣми нынѣ причащаемся Христову божеству, тогда же умнѣ самымъ зрѣніемъ ⁽¹⁾. Сиче вѣрую прочее, сиче исповѣдую предъ Богомъ создателемъ, моимъ же и всѣхъ, и не инако нѣкако; и за сіе готовъ есмь пострадати и душу мою съ желаніемъ и любовію положить. Сіе исповѣданіе есть іерусалимскія Церкви, съ неюже хочу до послѣдняго издыханія моего пребывати. За вся, яже писахъ прежде противно святѣй восточнѣй Церкви, и за введеніе соблазна, у великаго господина святѣйшаго куръ ІОАКИМА патріарха прошу прощенія и молитвы о мнѣ. И за тако великій той явленнаго противленія грѣхъ долженствую принять, се же ⁽²⁾ отъ сердца желаю, епитимію ⁽³⁾, отлученіе, наказаніе и испредѣленіе, якоже изволитъ великій господинъ святѣйшій ІОАКИМЪ патріархъ и весь священный соборъ, дабы мнѣ въ семъ вѣцѣ избавитися вины будущаго вѣка, казни вѣчнаго мученія. Здѣ желаю и обѣщаюся всякое наказаніе, за то мое противство, съ радостию терпѣти до конца живота моего.

(1) Св. Іоан дам. Точн. излож. прав. Вѣр. кн. 4 гл. 13. стр. 256. Москва. 1844 г.

(2) Въ упомянутомъ выше (стр. 100 примѣч. 3) постановленіи читаемъ: пріяти, еже.

(3) Въ рукописи: епитимію.

Аще же что писанія моего сего и покаянія, мною исповѣдуемаго, предлагаю ⁽¹⁾ не искренно, и не изъ всея души моя, или сомнѣнною совѣстію, или съ яковою неправедною мыслию, или лестно и притворно нѣкако, иная глаголя, иная же сокровенно мысля, или ради якова пріобрѣтенія и славы міра сего, а не ради истинны изъявленія и искренняго моего покаянія сія пишу, или на прежнее мнѣніе, бывшее мнѣ по прелщенію кіевскихъ новопечатныхъ книгъ и отъ Сүмеоновыхъ о томъ изданныхъ словесъ и устоглаголаній, возвращуся и таковая писати, или съ мятежники церковными яковыми сообщуся, или писанія ихъ яковая либо буду пріимати и оная яко истинну держати съ ними и люди тому учити, да буду ⁽²⁾ отлученъ и анаѳематствованъ отъ неразлучныя единосущныя Троицы, Отца и Сына и Святаго Духа, нынѣ и по смерти не прощенъ, и тѣло мое да не разсыплется, въ знаменіе вѣчнаго отлученія отъ Бога, за лжу мою сицевую, и душа моя да будетъ съ Іудого предателемъ и со Аріемъ лжекленшимся и съ прочими всѣми, противная мудрствующими святѣй восточнѣй Церкви, идъже звѣрь, имѣяй уста хулна, си есть антихристъ, мученъ будетъ день и ноцъ во вѣки вѣковъ, аминь.

Сіе мое покаянное рукописаніе, писавый азъ многогрѣшный Сенка своею рукою на совершен-

(1) Въ рукописи: предлагаю.

(2) Въ рукописи: да будетъ.

нѣйшее извѣщеніе искреннѣйшаго и неместнаго ко святѣй восточнѣй Церкви обращенія моего, прочеть всенародно, полагаю въ руки архипастыря крайнѣйшаго, святѣйшаго курь ІОАКИМА московскаго и всея Россіи и всѣхъ сѣверныхъ странъ патріарха, при всемъ священномъ соборѣ, въ храмъ пресвятыя Богородицы всечестнаго и славнаго ея успенія, престолномъ всероссійскія патріархіи, въ немже храмъ предлежатъ сосуди Святаго Духа, многоцѣлебныя мощи святыхъ митрополитовъ Петра, Іоны и Филиппа и иныхъ многихъ всероссійскихъ архіереевъ. И тыя вся и иныя святыя, и паче всѣхъ небесную Царицу, свидѣтели представляю истинному моему покаянію и о пресуществленіи отъ прелести латинскія, юже кіевскія новыя книги утверждаютъ, обращенію, въ лѣто отъ созданія міра ^{зрчи} мѣсяца ⁽¹⁾.

(1) Въ рукописи онъ не поименованъ здѣсь, а въ началѣ настоящаго исповѣданія сказано «декемврія» (смотри. выше стр. 85).

(2) Въ рукописи. Долгово.



**Издательство православной
богословской литературы
“АКСИОН ЭСТИН”
(Санкт-Петербург)**

Книги издательства “Аксион эстин” — это православные исследования, удачно сочетающие высокий научно-академический уровень и доступную форму изложения. Они будут интересны и полезны преподавателям и студентам богословских и гуманитарных ВУЗов, православных духовных академий и семинарий, всем верующим, желающим лучше понять христианское вероучение.

Посетите наш сайт в интернете по адресу:

www.axion.org.ru

На сайте:

- подробная информация о новоизданных книгах;
- возможность бесплатной загрузки большого количества электронных книг по богословию, библеистике, патрологии, которые легко читать на компьютере или распечатать на принтере;
- возможность заказать книги для доставки по почте (в том числе и электронные книги, которые высылаются на компакт-дисках).

Ваши вопросы и пожелания направляйте, пожалуйста, по электронной почте:

info@axion.org.ru